

19. — *Le Procureur.*

L'homme cault a veu la malice
 Pour l'innocent faire obliger,
 Et puis par voye de justice
 Est venu le pauvre affliger.

20. — *Le Conseiller.*

Les riches conseillez tousjours
 Et aux pauvres clouez l'oreille :
 Vous crierez aux derniers jours,
 Mais Dieu vous fera la pareille.

21. — *Le Prédicateur.*

Mal pour vous qui ainsi osez
 Le mal pour le bien nous blasmer,
 Et le bien pour mal exposez,
 Mettant avec le doulx l'amer.

22. — *Le Prêtre.*

Je porte le Saint Sacrement,
 Cuidant le mourant secourir,
 Qui mortel suis pareillement,
 Et comme luy me fault mourir.

23. — *Le Moine-Mendiant.*

Toy qui n'as soucy ny remord,
 Sinon de ta mendicité,
 Tu sierras à l'ombre de Mort
 Pour t'ouster de necessité.

24. — *La Nonne.*

Telle voye aux humains est bonne
 Et à l'homme tres juste semble ;
 Mais la fin d'elle à l'homme donne
 La Mort, qui tous pecheurs assemble.